

Communicaziun allas medias digl cumegn da Surses (nr. 4-2021)

Surses: Igl cumegn fò part er an futur agl parc dalla nateira Parc Ela

Las votantas ed igls votants digl cumegn d'urna da Surses on decidia oz dumengia cleramaintg da prolungar igl contract digl Parc Ela. An vista alla votaziun ò chel affar procuro per discussiuns controversas, percheigl tgi da nov è igl territori da skis integro aint igl perimeter digl parc. Igl cumegn d'urna Surses ò er gia da decider davart treis oters affars, tgi èn tots er nias acceptos.

Igl Parc Ela pò sa numnar er venavant igl pi grond parc dalla nateira an Svizra. Las votantas ed igls votants digl Surses on decidia all'urna, sen proposta dalla suprastanza communal, cun 61.06% da prolungar igl contract digl Parc Ela per igls onns 2022 anfignen igls 2031. La suprastanza communal è persvadeida, tgi en svilup persistent è d'avantatg per igl Surses e tgi la renovaziun ed amplificaziun dallas pendicularas da Savognin vignan betg restranscheidas, malgro tg'igl territori da skis è integro da nov aint igl perimeter digl parc. Igl oters cumegns tgi fon part agl Parc Ela, numnadamaintg Alvra, Barvogn Filisour, Tavo (fracziun da Tagn), Lantsch e Farrera on gio decidia pi bod da renovar igl contract da parc cun igl Parc Ela. La dumonda da renovar igl label Parc Ela ò ossa da neir inoltrada agl Uffezi federal d'ambiant per l'approvaziun.

Vendita d'ena parcella da biagier a Cunter

Cun 83.82% ò igl cumegn d'urna Surses accepto la dumonda da vender ena parcella da biagier cun ena surfatscha da 779 m² digl cumegn, ad en pèr indigen per biagier ena tgesa d'abitar (domicil primar). La vendita da chel taragn pò succeder angal a persungas tgi s'oblieschan da piglier domicil a Cunter per aglmanc 25 onns.

Revisiun parziala dalla lescha da biagier da Savognin

Cun 70.09% ò igl cumegn d'urna Surses accepto er la revisiun parziala dalla lescha da biagier da Savognin concernent la zona da hotel B a Viols, Savognin. Cotras ègl pussebel da neir siva all'intenziun fixada aint igl model directiv digl territori digl cumegn da Surses da sviluppar igl li da Viols scu territori da svilup per turissem ed alloschamaint. La revisiun parziala prevei l'adattaziun dalla cefra d'utilisaziun, dalla lunghezza admissibla digl bietg e dall'otezza dalla fatscheda tar bietgs cun tetgs plats. Ossa ò da neir publitgeida durant 30 dies l'exposiziun publica da recurs davart la revisiun parziala. Siva ò la revisiun parziala anc da neir approvada dalla regenza grischuna.

Contract da dretg da biagier cun la Kieswerk Bovas SA Lantsch/Lenz

Igl cumegn d'urna Surses ò accepto cun 75% la proposta dalla suprastanza communal da dissolver igl contract da dretg da biagier nr. 897, Plaz la Regzia, Tinizong, cun la Kieswerk Bovas SA Lantsch/Lenz. Igl madem mument è nia concedia alla Kieswerk Bovas SA Lantsch/Lenz igl dretg da biagier per la surfatscha parziala da 1'040 m² dalla parcella nr. 5048 ainten la zona d'industreia Punt a Cunter. Chella decisiun è en pass intermediar impurtant per pudeir realisar igl project „resurses2025“ dalla Uffer SA, tgi prevei d'eriger en center modern per l'elaboraziun da lenna a Tinizong.

Infurmaziuns:

Leo Thomann, mastral (e-mail: leo.thomann@surses.ch, telefonign 079 405 96 73)

Tinizong, 21.02.2021